



**ATASSUT**

**UKA 2016/58-1**

**Steen Lynge**

**04.10.2016**

**Aalajangiiffigisassatut siunnersuut, Naalakkersuisut misissuinissamut suliakkerneqarnissaat, saqqummiutissallugu innuttaasut aningaasaataannut qanoq sunniuteqartigissanersoq suliaritittussat utaqqisarnerisa annikilliseriaqqinnissaanut suliniut. Misissuineq paasissutissiissaaq suut periarfissaanersut utaqqisut ikilisinnissaannut aammalu aningaasartuutissat suusanersut. Misissuineq siunnersuutinik imaqassaaq.**

(Inatsisartunut Ilaasortaq Justus Hansen, Demokraterne)

Atassut-mit siunnersuuteqartoq qutsavigerusupparput, siunnersuummut ataavartumik soqutigintuutimut, tassalu peqqinnissaqarfimmi suliaritinnissamut utaqqisunut allattorsimaffik.

Peqqinnissaqarfiuk iluani atuuttut pillugit, Atassut-ip pisunut qanimut malinnaanissaq immikkut soqutigisaraa.

Innuttaasunut tamatigit pingaaruteqartuarpoq, napparsimalernermi sukkasuumik aammalu pitsaasumik sullinneqarnissaaq. Innuttaasut taamatut sullinneqarnissamik qulakkeerneqassappat, pisariaqarpoq, peqqinnissaqarfiup sinaakkutissanik – aningasatigit aammalu sulisutigit angumassinnaasunik peqartuarnissaa. Tamannalu Atassut-mit ukiuni amerlasuuni qulakkeerniarneqartuartsimavoq.

2010-imili mississuinerit takutippaat peqqinnissaqarfimmi aningaasartuutit 20-30 millionillu koruunit akornanni ukiumut aningaasaliissutit qaffanneqartariaqartassasut, peqqinnissaqarfik malinnaasinnaassappat.

Taamatut ataavartumik ukiumut qaffaasarnissamut pisariaqartitsisarnissaaq pissuteqarpoq assigiinngitsunik, ilaatigit taaneqarsinnaapput, katsorsaatit akitsoriartuinnarneri, katsorsaariaatsit nutaat akisunerit aammalu aningaasarsiat qaffakkaluttuinnarneri nunatsinni aammalu nunatta avataani.

Aningaasartuutit nutaat amerlasuut peqqinnissaqarfiuk sunniuteqarfigisinnaaneq ajorpai. Taamatullu ineriartortuarneq allanngortinneqarsinnaanani. Taamaamat pisariaqarluinnarpoq Inatsisartut peqqinnissaqarfiup unammilligassartaanut malinnaajuarnissaat.

Taaneqartariaqarpoq, peqqinnissaqarfiup ukiuni amerlasuuni aningaasartuutikillisaaneq ingerlassimammagu. Nunatsinni pisortat ingerlataanni aningaasaartuutikillisaanermut pikkoriffeqartoqarpat, peqqinnissaqarfik taassallugu mininneqarsinnaanngilaq.

Naak peqqinnissaqarfik aningaasartuutikillisaalluni suliuaraluartoq, suli suliaq naammassinngilaq. Sulimi pitsaanerusumik, sukkanerusumik aammalu akikinnerusumik peqqinnissaqarfik ingerlassinnaavarput.

Siunnersuut pineqartoq misissueqqusineramik aammalu inassuteqaatinik qanoq suliaritinnissamut utaqqisut ikilisinneqarsinnaaneranik imaqqassasoq kissaataavoq. Naak siunnersuut soqutiginaraluartoq, tassami ilisimasat nutaat pisariaqartuarput, taamaattoq siunnersuut tapersersoruminaappoq. Naalakkersuisummi akissuteqarnerminni erseqqissarpaat, suliaritinnissamut utaqqisut maanna ikiliartuinnarmata, allaat utaqqisut ima ikitsigilersimapput suliaritinnissamik pisariaqartitsisut suliarinissaannut, peqqinnissaqarfimmik malinnaasoqalersimalluni.

Taamatut oqaaseqarluta Naalakkersuisut tapersersorpagut inassutigimmassuk, siunnersuutigineqartoq tassalu misissuinissaq taperserneqassanngitsoq, maannangaaq misissuinissamik pisariaqartitsisoqanngimmat. Taamaammat siunnersuut itigartinneqassasoq.